



Komunikadu Imprensa
24 Maiu 2021
Parlamentu Nasionál

JSMP husu PN aloka orsamentu suficiente hodi apoia CAC nia serbisu

Parlamentu Nasionál (PN) liuhusi reuniaun plenaria Segunda-feira, 17 Maiu 2021, husu ba Komisaun Anti-Korrupsaun (CAC-sigla Portugés) atu hatudu ninia natureza no kapasidade polisiál iha ninia atuasaun sira iha ámbitu serbisu prevensaun no kombate krime korrupsaun iha Timor-Leste. Deklarasaun no afirmasaun sira ne'e hato'o iha okaziaun apresentasaun relatóriu jerál anuál CAC nian ba período tinan 2020 iha uma fukun PN.

Durante sesaun husu no hatan, deputadu sira iha PN preokupa no apresenta crítica kona-ba atuasaun CAC ne'ebé la hatudu progresu significativu mezmhu instituisaun ne'e funsiona ka eziste ona durante dekade ida. Deputadu sira hatudu faktu balun hanesan relatóriu fiskalizaun prévia husi Tribunál Kámara Kontas nian, relatóriu husi Komisaun Funsuun Públika no mós kazu sira ho montante orsamentu boot hanesan porto-Hera, projetu adisionál ponte Komoro I ne'ebé ninia prosedimentu la tuir rejime aprovizionamentu ne'ebé hatudu indísiu forte kona-ba krime korrupsaun maibé PN la haree hetan iha relatóriu CAC nian ne'e.

“JSMP apresia observaun krítiku husi deputadu sira ba iha CAC tanba knaar PN nian ida mak halo fiskalizaun ba serbisu Governu nian, inklui instituisaun públika hanesan CAC. Krítika sira ne'e bele tulun CAC hodi serbisu ho di'ak liu no efetivu liután iha prevene no kombate korrupsaun iha Timor-Leste, maske nune'e JSMP mós husu ba PN atu hatudu asaun polítika konkretu hodi koloka orsamentu natoon ba apoia serbisu CAC nia” dehan Diretora Ezekutiva JSMP, Ana Paula Marçal.

Mezmu nune'e, hanesan JSMP antes ne'e apresenta iha Sorumutu Konsulta Públika Ba Dezenvolvimentu Planu Estratéjiku CAC tinan 5 nian husi 2021-2025, iha Outubru 2020, alende asuntu importante sira seluk, JSMP mós husu ba PN atu bele aseguara rekursu finanseiru, umanu no fasilidade ne'ebé adekuaudu, inklui seguransa ba CAC atu bele hatan ba situasaun sira ne'ebé durante ne'e CAC enfrenta. JSMP fiar katak CAC sei halo serbisu di'ak liután bainhira iha apoiu polítika no kontribuisaun másimu husi nível sosiedade hotu. JSMP mós hanoin

katak apoiu no vantade polítika Parlamentu nian ne'e la bele sai hanesan "retórica polítika" de'it, maibé tenke liuhusi asaun polítika ida konkreta ho aloka rekursu orsamentu ne'ebé suficiente atu CAC bele funsiona no implementa ninia planu asaun anuál sira.

Deputadu sira akresenta tan katak CAC tenke brani no hatudu asaun konkretu no intensivu iha serbisu kombate krime korrupsaun tanba CAC hetan apoiu polítiku no morál boot husi PN. Apoiu ne'e bele haree husi momentu eleisaun ba Komisáriu CAC ba períodu mandatu datoluk ne'ebé hatudu katak deputadu 42 mak fó nia votu ba hodi hili Komisáriu atuál husi total deputadu na'in 57 ne'ebé marka prezensa.

Alende preokupasaun no crítica sira kona-ba produtividade no atuaasaun CAC nian, deputadu sira mós kestiona maka'as rezultadu akompañamentu CAC ba orsamentu Covid-19 ne'ebé introdús ba subsídiu agregadu familiár, subsídiu ba motorista, programa sesta bázika ne'ebé hatudu indísiu forte ba krime korrupsaun.

Liután, deputadu sira ilustra sirkulasaun rede krime brankeamentu ba kapitál ne'ebé akontese iha Timor-Leste, no rede mafiozu sira iha arendamentu ba uma no rai Estadu nian ne'ebé antes ne'e Ministériu Justisa pronúnsia ona publikamente.

Komisáriu CAC, iha ninia apresentasaun relatóriu anuál 2020, relata ba PN katak iha tinan 2020, mezmú iha restrisaun regra no protokulu prevensaun Covid-19 no situasaun polítika nasional ne'ebé inserteza, CAC kontinua funsiona ho limitasaun oioin ne'ebé enfrenta.

Relatóriu ne'e deskreve total kazu hamutuk 73 ne'ebé CAC investiga durante tinan 2020. Husi número kazu ne'e, kazu 56 delega husi Ministériu Públiku (MP) no kazu 17 nu'udar kontinuasaun investigasaun husi tinan 2019 ne'ebé seidakonklui. Kazu sira ne'e maioria envolve abuzu poder, pekulatu, partisipasaun ekonómia iha negósiu, administrasaun danoza, korrupsaun pasiva iha aktu ilísitu, no pekulatu uzu no falsifikasaun. Husi kazu ne'ebé CAC investiga, CAC consege identifika poténsia prejuizu ba Estadu hamutuk \$115, 588. 58.

Enkuantu iha área serbisu prevensaun nian, relata atividade kona-ba elaborasaun estratéjia nasional anti-korrupsaun, atividade

Rua Beco Lakateu, Aldeia Manufuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
ana@jsmp.tl

Facebook: www.facebook.com/timorleste.jsmp

sensibilizasaun públiku no serbisu inspesaun no monitorizasaun ba programa subsidiu agregadu familiár no sesta bázika.

Iha relatóriu ne'e, informa katak através atividade inspesaun no monitorizasaun ba programa sesta bázika konsege salva osan Estadu hamutuk \$385.400.00 husi benefisiáriu sira ne'ebé la prenze rekizitu tuir lei. Iha relatóriu ne'e, sita mós katak ida-ne'e nu'udar rezultadu serbisu hamutuk ho intituisaun fiskalizadór sira hanesan Provedoria Direitu Umanus no Justisa (PDHJ), Inspetór Jerál Estadu (IJE), Komisaun Funsan Públika (KFP), JSMP, FONGTIL, no estudante universitariu hamutuk ho joventude no ativista/voluntáriu sira husi AJAR.

Aprezentasaun ne'e hatudu mós dezafiu sira ne'ebé CAC enfrenta durante implementa ninia programa anuál hanesan; 1) estabilidade polítika ne'ebé inserteza implika ba esforsu sira atu prevene no kombate korrupsaun, 2) pandemia COVID-19 ne'ebé permite risku korrupsaun barak akontese, 3) limitasaun rekursu orsamentu no facilidade serbisu.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Website: <http://jsmp.tl>

www.jsmp.tl

Rua Beco Lakateu, Aldeia Manufiuk,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
ana@jsmp.tl

Facebook: www.facebook.com/timorleste.jsmp